

मार्निंग डोगरी न्यूज़ बुलेटिन, समें. 09-20 Hrs



Headlines

- श्री अमरनाथ जी दी यात्रा लेई 4 ज्हार 434 श्रद्धालुएं दा इक होर जत्था जम्मू दे भगवती नगर आले आधार शिविर थमां घाटी लेई रवाना होआ।
- केन्द्रीय बलें आस्सेआ साबका अग्निवीरें गी भर्ती च 10 फीसद आरक्षण हासल होग।
- बीएसएफ ते पुलस दे अंतरराज्य अधिकारिं दी कल कदुआ च इक उच्च सतह दी सुरक्षा जायजा बैठक लग्गी।
- जिला प्रशासन उधमपुर नै नशा मुक्ति सरबंधी केन्द्र कायम करने लेई जतन शुरू कीते।



Amarnath Yatra

श्री अमरनाथ जी दी यात्रा लेई जम्मू दे भगवती नगर आले आधार शिविर थमां 4 ज्हार 434 श्रद्धालुएं दा इक होर जत्था घाटी लेई रवाना होआ। एह श्रद्धालु 165 गड्डिं दे काफले च सुआर होइयै अज्ज बडलै अगड़ी यात्रा लेई रवाना होए। इस जत्थे च 3 ज्हार 330 मर्द, 915 महिला, 28 बच्चे, 133 साधु, 28 साध्वियां शामिल न। कुल 4 ज्हार 434 श्रद्धालुएं चा इक ज्हार 721 बालटाल ते ते 2 ज्हार 713 पहलगाम लेई रवाना होए।



Agniveer

केन्द्रीय बल साबका अग्निवीरें आस्तै 10 फीसद आरक्षण लागू करोग। अग्निवीर योजना पर बैहस दे चलदे केन्द्रीय बलें घोषणा कीती ऐ जे ओह साबका अग्निवीरें आस्तै 10 फीसद आरक्षण लागू करोग।

सीमा सुरक्षा बल, केन्द्रीय रिजर्व पुलस बल केन्द्रीय औद्योगिक सुरक्षा बल,ते सशस्त्र सीमा बल जनेह केन्द्रीय बलें दे प्रमुखें आखेआ जे साबका अग्निवीरें दी उमर च छूट होग ते उंदे आस्तै कोइ बी शारीरिक जांच सरबंधी परीक्षा बी नेई होग ।

<><><><><><>

Security Meeting

सुरक्षा तंत्र गी मजबूत करने ते सीमा सुरक्षा बल, पंजाब पुलस ते जम्मू कश्मीर पुलस बश्कार तालमेल बधाने उप्पर ध्यान देने लेई कठुआ च इक उच्ची सतह दी बैठक लोआई गई। इस बैठक दा मुख मकसद मजूदा सुरक्षा स्थिति दा जायजा लैने दे कन्नोकन्नी चुनौतिएं दा मकाबला करने लेई मजबूत रणनीतियां बनाना हा। इस बैठक च बीएसएफ वेस्टन कमांड दे स्पैक्टल डीजी-वाई.बी.खुशनिया, जम्मू कश्मीर डीजीपी आर.आर.स्वैन, डीजीपी पंजापब गौरव यादव ते होरने आला अफसरें हिस्सा लैता। बैठक च बन्ने राएं होने आली तस्करी नशाखोरी, थेआर ते प्रतिबंधित सामग्री दी तस्करी पर चर्चा कीती गई। अफसरें इस सिलसिले च हाल च गै होई दी कारवाइयां खूफिया जानकारी ते तस्करी लेई इस्तेमाल कीते जाने आले रस्ते ते तरीकें बारे बी तफसीली चर्चा कीती। इस बैठक च नाके आले चैक पोस्टें गी मजबूत करना, तपाशी अभियान बधाना ते केनाइन इकाइएं दी समर्थ गी बधाने दे महत्ता पर लोह पाई गई।

<><><><><><>

Army Commander

सेना दे उत्तरी कमान प्रमुख लैफ्टिनेंट जनरल एम.वी.सुचिन्द्रा कुमार होरें कल लद्दाख च सियाचीन ग्लेशियर च फॉरवर्ड पोस्टें दा दौरा लाया ते सैनिकें गी आखेआ जे ओह हर चाल्ली दी स्थिति थमां निबड़ने लेई पूरी चाल्ली तैआर रौहन। प्रमुख होरें गुआंढी मुख् पाकिस्तान कन्नै सीमावर्ती इलाके पर तनदेई कन्नै पैहरा देने लेई फौजिएं दी सराहना कीती। सेना प्रमुख हुंदे कन्नै फॉयर एंड फ्यूरी कोर दे जीओसी बी मजूद हे।

<><><><><><>

CBI-Arrest

सीबीआई नै राकेश रंजन उर्फ रॉकी नांह दे व्यक्ति गी गिरफ्तार कीता ऐ जेहड़ा मन्नेआ जा'रदा ऐ जे नीट पेपर लीक मामले दा सरगना ऐ। इस आरोपी गी 10एं दिनें लेई सीबीआई दी हिरासत च भेजेआ गेआ ऐ। ओह इस जालसाजी दे इक होर प्रमुख व्यक्ति संजीव मुखिया कन्नै बी जुड़े दा ऐ जेहड़ा दरुं दहाकें थमां घोटाले च शामिल ऐ ते फरार बी ऐ। हुन रॉकी दी गिरफ्तारी कन्नै सीबीआई गी अपनी जांच च मदाद मिली सकदी ऐ। जांच अजेंसी नै हुनै तगर झारखंड दे हजारीबाग दे इक स्कूल दे प्रिंसिपल ते वाईस प्रिंसिपल सनें 12 लोकें गी गिरफ्तार कीता ऐ। सीबीआई ते बक्ख-बक्ख राज्यें दे पुलस बल इस गोरखधंधे दी जांच करे करदे न जेहदे च नीट जनेह् मतेयानें च पर्चा-लीक करना बी शामिल ऐ। सीबीआई नै हुनै तगर 6 एफआईआर दर्ज कीतियां न।

<><><><><><>

DC Poonch

पुंछ दे जिला प्रशासन नै पुंछ दी शैल सनाकड़ी ते मनमोहक थाहरें दा पता लाने, उंदे बारे जानने लेई इक निजी ट्रैकिंग संगठन कन्नै हत्थ मलाया ऐ। एहदा मकसद इलाके दी शैल सनाकड़ी थाहरें, ओ थाहरा जिंदे बारे मते लोकें गी अजें नेई पता ऐ, उंदे बारे दस्सना दसाना ऐ। इस जतन तैहत ट्रैकिंग सरबंधी एह निजी संगठन प्रतिभागिएं गी इक जबरदस्त यात्रा पर लेई जाग, जेहदे राएं ओह बक्ख-बक्ख थाहरें गी दिक्खगंन। एह साथ सैहयोग जिला प्रशासन ते संगठन बश्कार इक रणनीतिक गैह् ऐं इस जतन तैहत लोकें गी पुंछ दी केई सारी थाहरें पर ट्रैकिंग करने ते इनें थाहरें बारे पता लाने दा मौका थहोग।

<><><><><><>

DC Udhampur

उधमपुर दियां डिप्टी कमीशनर सलोनी राय होरें चीफ मैडिकल अफसर डॉ. अनिल मन्हास ते जिला समाज कल्याण अधिकारी कनिका गुप्ता हुंदे कन्नै रलियै कल उधमपुर जिले च नशा-मुक्ति केन्द्र कायम करने लेई मुनासब थाहर दी पंछान करने लेई दौरा लाया। दौरे दरान जिला समाज कल्याण अधिकारी होरें डिप्टी कमीशनर होरें गी इस केन्द्र दी कारकरदगी योजना बारे तफसीली जानकारी दिक्ती।

डिप्टी कमीशनर होरें मुत्तलका अधिकारिणं गी केन्द्र गी कायम करने दी प्रक्रिया गी तेज करने लेई आखेआ तां जे जरूरतमंदें गी तौले मदाद उपलब्ध करोआई जाई सकै। उनें भरोसा दोआया जे जिला प्रशासन नशे थमां प्रभावत लोके गी हर मुमकिन मदाद उपलब्ध करोआग ते उंदे समाजी एकीकरण लेई सरकार आस्सेआ चलाई जा'रदी बक्ख-बक्ख स्कीमें राएं सहायता करोग।

<><><><><><>

Secretary Health

सेहत ते मैडिकल शिक्षा मैहकमे दे सचिव डॉ. सईद आबिद रशीद शाह होरें जम्मू कश्मीर राष्ट्रीय आयूष मिशन दी इक कारजकारी समिति दी बैठक दी अध्यक्षता कीती। सेहत सचिव होरें निर्देश दित्ते जे सलाना कारवाई योजना 2024-25 गी तौले शा तौले आयूष मंत्रालय ते गवर्निंग बॉडी गी सौंपेआ जा तां जे मिशन तैहत जरूरी गतिविधिणं दी असरदार अमलावरी जकीनी बनाने लेई फंडें गी तौले जारी कीता जा। डू. आबिद रशीद होरें प्रदेश च राष्ट्रीय आयूष मिशन दी असरदार अमलावरी लेई जरूरी जतनें दी लोड़ पर बी लोह पाई। उनें इस मिशन दी महत्ता गी उजागर करदे होई सब्बने धरें गी किट्ठे रलियै लगन कन्नै कम्म करने लेई गलाया तां जे इसी सफल बनाया जाई सकै ते प्रदेश च आयूष सेहत दिक्खभाल सेवाएं दे प्रचार प्रसार ते आसानी कन्ने उपलब्धता गी जकीनी बनाया जाई सकै।

<><><><><><>

DC Doda

डोडा दे डिप्टी कमीशनर हरविंदर सिंह होरें जिला सतह स्थाई कमेटी दी बैठक दी अध्यक्षता कीती ते राज्य ते मैहकमे दी जमीन पर कीते गेदे गैर कनूनी कब्जे सरबंधी मामलें पर चर्चा होई। इस बैठक दरान जमीन पर कीते गेदे गैर कनूनी कब्जे कन्नै सरबंधी मामलें पर चर्चा कीती। इस दरान इनें समस्याएं ते मसलें दे हल आस्तै रणनीति बी बनाई गई। डिप्टी कमीशनर होरें सरकारी जमीन पर कब्जा करने आले खलाफ सख्त कारवाई करने लेई आखेआ। उनें सरबंधी अफसरें गी आखेआ जे ओह इस गल्ला गी जकीनी बनान जे सरकारी जमीनें दे सारे रिकार्ड ताजा तरीन होन ते उंदे बारे पूरी जानकारी होए। बैठक दरान लैते गेदे फैसलें दी बेहतर ते कारगर ढंगै सिर अमलावरी पर बी जोर पाया गेआ।

<><><><><><>

DC Rajouri

राजौरी दे डिप्टी कमीशनर ओ.पी.भगत होरें इक बैठक दरान जिले दे युवाएं दी जरूरतै स्हाबै इक कारगर योजना तैआर करने दी जरूरतै पर जोर पाया जेहूदे राएं बजार दी मंग ते हुनर बश्कार दी बित्थ गी पूरा कीता जाई सकै। उनें लक्षित लोकें दी पंछान करने, उंदे हुनर दा पता लाने, हुनर गी बढ़ावा देने ते उंदे लेई हुनर सरबंधी प्रोग्राम तैआर करने पर जोर पाया। डिप्टी कमीशनर होरें आखेआ जे अपने हुनर गी निखारने, होर बेहतर बनाने लेई नेकां मौके उपलब्ध न। उनें गलाया लोड़ ऐ बेरोजगार युवाएं गी शिक्षित करने दी उनेंगी हुनर सरबंधी सिखलाई लैने आस्तै प्रेरित करने दी तां जे ओह बेहतर करी सकन।

<><><><><><>

World Population Day

विश्व जनसंख्या दिवस 2024 दे मौके पर परोआर कल्याण निदेशालय आस्सेआ गांधीनगर दे सरकारी अस्पताल च इक जागरूकता रैली दा सरस्ति कीता गेआ। इस रैली दा मकसद परिवार नियोजन ते टिकाऊ जनसंख्या वृद्धि दी महत्ता पर लोह पाना हा। अस्पताल दे मैडिकल सुपरीटेंडेंट डॉ. हामिद जरगर होरें रैली गी झंडी दस्सियै रवाना कीता। एह रैल गांधीनगर दे बक्ख-बक्ख इलाकें ते शौहरें दी मुख् मुख् थाहरें थमां लंघी। किट्ठे गी संबोधत करदे होई डॉ. हामिद जरगर होरें मातृ स्वास्थ्य ते गर्भनिरोधक बारे जानकारी देइयै समाज गी सशक्त बनाने दी महत्ता गी उजागर कीता। उनें अस्पताल आस्सेआ गर्भवती महिला ते उंदे परोआर गी मदाद ते परामर्श देने लेई बक्ख-बक्ख जतनें गी बी उजागर कीता।

<><><><><><>

PMAY-G

प्रधानमंत्री आवास योजना ग्रामीण तैहत राजगढ़ ब्लाक दी झामन पंचैत दे बहादुर सिंह हुंदे घर दा निर्माण पूरा होई जाना इस योजना तैहत सरकार दी जारी जतनें दी इक सफल मिसाल ऐ। ग्रामीण विकास मैहकमे आस्सेआ बहादुर सिंह हुंदे घर दे निर्माण लेई 1 लक्ख 30 ज्हार रपे मंजूर कीते गेदे हे। जिसगी त्रऊं किश्ते च दित्ता गेआं माली मदाद दे कन्नोकन्नी निर्माण दरान तकनीकी सहायता बी उपलब्ध करोआइ गई। बहादुर सिंह जेहूड़े इक करसान न ते कन्नै गै मजदूरी बी करदे न, उनें उस्सेथाहर पर कच्चे मकान च केई चुनौतिएं दा सामना कीता ऐ ते हुन पक्के घर दे इस तब्दीली नै उंदे जीवन शैली गी बेहतर बनाया ऐ तां जे ओह सुरक्षत अपने परेआर कन्नै रेई सकन।

<><><><><><>